

NOS NATURALES...



Un di e matanan mas bunita cu nos conocé den den nos area tropical ta e **BELLISIMA**. E ta original di Centro America of mihor bisá di Mexico, pesey e americanonan ta jamé "Mexican Creeper". Aki banda - dunando honor na su belleza - nos ta jamé **BELLISIMA**. Otro islanan sa jamé "Coralito", paso su flornan ta parce coralnan chikito.

Tin caminda cu bo ta mira e mata ta rama bunita riba trankera. Pero riba cualquier mu-*raya*, rekki of curá e ta subi. Su stengelnan ta fini, pero e ta lora su 'brazanan' fini rond di loke e haya p'e wanta su mes na halto.

Su blachinan tin un color berde dof y tin forma di curazon. E blachi su rand ta olá. Su flornan ta roos bibo y ta crece na un troshi jen cu ta atrae bista di hende.

Nan ta contene hopi miel, ta pesey tur ora abejanan ta rondon'é. Pa su miel y su color jamativo.

Asina cu awa jobe poco, e **BELLISIMA** ta cuminza subi y floriá abundantemente. Hasta den tempo di segura e ta sobreviví. Esaki ta pasobra tin caminda cu su raíznan ta diki y ta wanta awa.

E belleza den nos cunucu - **BELLISIMA**.

Un rat'i ora cu Tanta Dora Nos burico



Com bai muchanan?

Laga Tanta Dora pone su basora un banda pa nos papia un rato.

Awe mi ta bai conta algo tocante nos burico.

Boso sa cu tin un fundacion cu jama: "Salba nos Burico". E fundacion aki tin un cunucu yen di burico na Santa Lucía, esey ta na Santa Cruz.


Burico ta un bestia util. Antes cu no tabatin auto e ta e medio di transportacion. Ta bai cunucu riba burico pa corta aloë, ta bai playa cumpra provision na tienda, ta bai misa diadomingo y den siman ta bai saca awa na pos. Ora di bai saca awa na pos ta pone dos halifat, un cada banda di e burico. Esakinan ta manera dos bari rondó trahá di palu y wantá cu un faha di cuero.

Riba su lomba ta pone e subadera. E ta traha di cuero di carné, of di lona oftijk, esaki ta un paña. E subadera ta pa no feila e burico su lomba ora pone e siya. E siya ta manera un stoel di palu pa sinta ariba. Den su boca ta pone un frena (bit), esey ta pa guié ora e ta camna. Na e siya ta colga e stribo (beugel), esey ta dos pida hero manera un driehoek pa hinka bo pia aden. E golefera ta manera un banchi hanchu cu ta pasa bao di su rabu pa ora e haci su necesidad e no susha su curpa. E golefera ta tene e rabo lantá y leo di e curpa.

Boso sa cu ora di casamento ta riba burico e bruid ta sinta. Pa carga e bruid ta pone un cusinchi bunita riba e siya y ta tapa e burico su lomba cu un sobrecama blancu cu fraña na su zom, su bisti di fiesta. Ta e bruid so ta sinta riba e burico, e bruidegom ta camna na pía y tene e cabuja. Patras di e bruid ta sinta un mucha homber chikito di 10 pa 13 año. E ta sinta siya homber (un pia cada banda di e burico) y e bruid ta sinta siya muher, esta tur dos pía na mes banda.

Pa e ocasion ey e burico ta haya un krans di flor na su garganta trahá di papel di crêpe of papel di cadushi (pa pel di traha flie). Te aki algo tocante nos burico.....

Muchanan, te un otro biaha,
Tanta Dora.





CHABALITO

Number 1 - Año 2 - September, 1999 - Afl. 2,=

